

Fatg ses duvair cun bravura

Cussegliera federala Eveline Widmer-Schlumpf sa retira cun la fin da quest onn

DA MARTIN CABALZAR

■ **Cun in surrir ha cussegliera federala Eveline Widmer-Schlumpf communitgà ier sia demissiun sin la fin da l'onn. Sia demissiun considerescha Widmer-Schlumpf era sco schanza per sia partida.** *Eveline Widmer-Schlumpf* ha infurmà ier il president da l'assemblea federala ch'ella sa retira sin la fin da l'onn. A la conferenza da medias en chasa federala ha la cussegliera federala partenta engrazià a tut las collavuraturas ed als collavuratur per la collavuraziun. Era sch'i saja stà temps intensivus cun il salvament da la banca UBS l'october 2008 cun far la nova strategia da finanzas. Sco Eveline Widmer-Schlumpf ha ditg ier saira haja ella otg onns fitg intensivus davos ella.

La decisiun da betg recandidar ils 9 da december per il cussegl federal haja ella discutà cun sia famiglia, cun amis e cun collegas da partida. «La decisiun hai jau prendì glindesdi suenter las elecziuns, perquai ch'jau vulev tegnair libra la situaziun per la partida avant las elecziuns. La partida saveva però ch'jau ponderechia da demissionar.» Ella saja persuadida che quai saja era bun per la Partida burgais-democratica (pbd), ha ditg Widmer-



Suenter otg onns d'intensiva lavur ha cussegliera federala Eveline Widmer-Schlumpf avunda.

KEYSTONE

Schlumpf. La partida n'haja betg pudì far politica perquai che ella sezza sco persuna saja adina stada en il center da las discussiuns. Uschia saja quai ina entschatta per la pbd e betg la fin.

Eveline Widmer-Schlumpf è vegnida tschernida cunter la veglia da sia partida ils 12 da de-

ember 2007 en il cussegl federal enstagl da confermar *Christoph Blocher*. Sco reacziun ha la pps svizra exclus ella e la secziun grischuna. Uschia è Widmer-Schlumpf betg daventada la represchentanta da la pli gronda partida, mabain dad ina pitscha partida pbd. En la retrospectiva

ston schizunt ses adversaris politics conceder che Eveline Widmer-Schlumpf è ina da las pli «intelligentas e chapavlas magistratas da noss temp». Ella ha instradà e realisà pliras impurtantas refurmas. Ella n'ha perdì betg ina solia votaziun dal pievel.